

# DIE SUID-AFRIKAANSE AKADEMIE VIR WETENSKAP EN KUNS



Privaat sak X11, Arcadia, 0007  
Soutpansbergweg 92, Riviera, Pretoria 0084  
Tel. 086-133-3786 / Faks 012-329-0293  
[akademie@akademie.co.za](mailto:akademie@akademie.co.za)  
[www.akademie.co.za](http://www.akademie.co.za)

## DIE JAN H. MARAISPRYS

31 Maart 2017

### JAN H MARAISPRYS 2017

Die Jan H. Maraisprys vir 'n uitstaande bydrae tot Afrikaans as wetenskapstaal word vanjaar gesamentlik toegeken aan prof. Jaap Steyn van Bloemfontein en prof. Jan van der Watt van Nijmegen, Nederland. Die prysgeld van 'n halfmiljoen Rand as erkenning vir hulle lewenstaak ten bate van akademiese Afrikaans word gelykop tussen die twee prysweners verdeel en sal op 30 Mei 2017 by 'n funksie op Stellenbosch aan hulle oorhandig word.

Hierdie besluit is bekend gemaak deur die voorsitter van die keurkomitee, prof Andreas van Wyk, oud-rector van die Universiteit Stellenbosch.

Prof. Steyn, seker Suid-Afrika se bekendste taalhistorikus, is in 1938 naby Fouriesburg in die Vrystaat gebore. Hy is 'n oud-Kovsie wat nagraads verder in Amsterdam studeer het en sy doktorsgraad in algemene taalwetenskap in 1969 aan die destydse Universiteit van Port Elizabeth (UPE) behaal het. Hy het sy loopbaan begin as 'n joernalis by die *Volksblad*, 'n beroep waartoe hy in 1974 tot 1975 kortliks by *Rapport* teruggekeer het. Sy roeping was egter dié van akademikus, eers by die destydse UPE en Randse Afrikaanse Universiteit (RAU) en dan as professor in Afrikaans en Nederlands aan die Universiteit van die Vrystaat (UV) in Bloemfontein. Aan die einde van 1997 het hy daar met amptelike pensioen afgetree.

Jaap Steyn het oor die afgelope bykans vyftig jaar honderde publikasies geskryf, van koerantartikels tot gedigte en kortverhale. Sy biografieë van NP van Wyk Louw, Piet Cillie en MER word as standaard beskou. Hy het veral bekend geword vir sy twee boeke oor die geskiedenis van Afrikaans, *Tuiste in eie taal* (1980) en *Ons gaan 'n taal maak* (2014).

Vir sy werk het prof. Steyn reeds talle eerbewyse ontvang, onder andere die Stalsprys, die Louis Hiemstraprys, die NP van Wyk Louwmedalje en Erelidmaatskap van die Suid-Afrikaanse Akademie vir Wetenskap en Kuns.

Prof. Jan van der Watt, gebore in Germiston aan die Oos-Rand in 1952, het sy eerste graad aan UPE behaal en alle daaropvolgende grade *cum laude* aan die Univ. van Pretoria (UP).

Hy het ook twee doktorsgrade verwerf. Sy loopbaan as teologiese akademikus het hy begin aan die Universiteit Fort Hare in die Oos-Kaap, waarvandaan hy in 1986 aan die UP se Fakulteit Teologie aangestel is. Van 1986 tot 2009 was hy as professor in Nuwe Testament en departementshoof aan dié fakulteit verbonde. In 2009 aanvaar Jan van der Watt 'n professoraat in Nuwe Testament aan die Universiteit Radboud in Nijmegen, Nederland.

Gestig in 1923 as die Katolieke Universiteit Nijmegen en hernoem in 2004 (na 'n vroeg-Middeleeuse biskop en geleerde) geniet dié instelling met sy huidige 20 000 studente internasionale aansien vir sy navorsing en onderrig (121ste plek op die THE-ranglys van 2017).

Prof. Van der Watt geniet wêreldwye erkenning as deskundige oor die Nuwe Testament en as sodanig het hy bande met akademiese instellings wat strek van Duitsland en Rusland tot Suid-Korea. Sy talle publikasies (waarvan baie in Afrikaans, maar ook in Duits, Engels en Nederlands) het tot eerbewyse en ook uitnodigings na akademiese instellings orals ter wêreld gelei. Aan die UP is hy as 'n uitstaande akademikus presteerder erken. In Suid-Afrika het hy onder andere die Andrew Murrayprys en die Suid-Afrikaanse Akademie vir Wetenskap en Kuns se Ds. Pieter van Drimmelenmedalje ontvang.

Jan van der Watt is getroud met Shireen (gebore Crous). Die egpaar het 'n dogter, Nireen Visagie, en 'n kleindogter Jana. Hulle woon tans in die dorp Molenhoek, suid van Nijmegen, 'n ou Nederlandse stad naby die Duitse grens.

Die jaarlikse Jan H. Maraisprys is in 2015 geskep deur 'n besluit van Het Jan Marais Nationale Fonds, Naspers en die Universiteit van Stellenbosch. Al drie instellings het hulle ontstaan te danke aan die versienende steun van Johannes Henoeh Marais (1860-1915) van Stellenbosch wat saam met sy broers in die 1870's hulle fortuin op die Kimberleyse diamantvelde gemaak het. Jannie Marais was 'n groot ondersteuner van Afrikaans as 'n akademiese en literêre taal.

Die prys vir 'n lewensbydrae tot akademiese Afrikaans word geadminestreer deur die Suid-Afrikaanse Akademie vir Wetenskap en Kuns. Die keurkomitee van vooraanstaande akademici uit verskillende dissiplines het vanjaar bestaan uit proff. Andreas van Wyk (Stellenbosch), Christof Heyns (Pretoria – afwesig), Debra Meyer (Johannesburg), Piet Steyn (Stellenbosch) en Johan van Zyl (SANLAM).

#### **Kontak:**

**Prof. Jaap Steyn: 051 436 0825; 078 925 2568; [steynjaap@gmail.com](mailto:steynjaap@gmail.com)**

**Prof. Jan van der Watt: 0031 24 663 6571; 079 663 8000; [janvanderwatt@kpnmail.nl](mailto:janvanderwatt@kpnmail.nl)**

**Prof. Andreas van Wyk: 082 809 3113; [ahvw@sun.ac.za](mailto:ahvw@sun.ac.za)**

**SA Akademie vir Wetenskap en Kuns: dr. Dionē Prinsloo: 082 464 6953;**

**[dprinsloo@akademie.co.za](mailto:dprinsloo@akademie.co.za)**

*Prof. Jan van der Watt*



*Prof. Jaap Steyn*

